

Hypochonder



Texscht : Mike Sutter
Musig : Mike Sutter

**Nöchscht Mäntig Morge früh muess i zum Rheumaschpezialischt
am Dsiischtig de vom Urolog diräkt zum Internischt
Am Mittwoch geit's zum Orthopäd, am Donnschtig git's Chemie
am Fritig cha ni gottseidank i'd Physiotherapie**

**Immerzue tuet mir - äs hett's dr Tüfu gseh
irgendnöime irgendwie irgendöppis weh
äs zwicke oder schtäche, äs riisse oder zieh
do in und i dr Site, dört unge oder hie**

**I zieh d'Lide a wie's Liecht d'Insekte - s'isch extrem
Medizinisch gseh bi ni äs wandelnds Phänomen
was i a mir aus diagnoschtiziere - unerhört
s'dünkt mi ig erkrank a auem wo ni je ha ghört**

**I bi so öppis vo bemitleidenswärt
würum wird mir nid agmässe Mitleid gwährt
bi plooget immerzue
ha ke Minute Rueh
doch s'lost mer niemer zue
ömu nid gnue**

**Würum usgrächnet wird bi mir us auem äs Problem
jedes rote Pünktli isch vo noochem äs Ekzem
oder aber Hutchräbs, äs chönnti guet si da
i mit zwöufi schliesslech mou ä Sunnebrand ha gha.**

**Klar hett sich denn Unvorsicht mit Übermuet paart
Süs chachte i gäng piinlechtscht druf dass mir nüt widerfahrt
i schüüche d'Cheuti, d'Sunne, sogar d'Luft isch mir suschpächt
u s'Wasser usem Hahne isch vergiftet und verdräckt**

**Täglech dünkt's mi einisch z'mingscht - Oherrjemine
s'Ändi noochet jetze isch's ändgütig um mi gscheh
Ha's immer scho erwartet, ha gwüsst äs chunnt e so
ä unheilbari Chrankheit hett d'Chraue ine glo**

**I bi so öppis vo bemitleidenswärt
würum wird mir nid agmässe Mitleid gwährt
bi plooget immerzue
ha ke Minute Rueh
doch s'lost mer niemer zue
ömu nid gnue**

I lo mi lo düretschegge s'duuret sibe Schtung
s'Resultat isch niderschmättern, sig i doch chärngung
jetz suech i mir sofort ä nöje Dokter unbedingt
wü wie bi auem zeut ou hie wär richtig suecht dä fingt

Gsundheitsbüecher si mi Lieblingsliteratur
i kenne jedes Lide, d'Symptom und sini Kur
i weiss vo jeder Süuch und ihrne Chrankheitstreger
im Internet fingsch aus über die brandnöschte Erreger

Mi Husapithek isch dr Schlofzimmerschaft
Püuverli, Tablette, Chrüttli, Öu u Hueschtesaft
aues ä chli aabrucht, äs platzt fasch us dr Tür
doch s'einzige wo würkt si d'Näbewürkige bi mir

I bi so öppis vo bemitleidenswert
würum wird mir nid agmässe Mitleid gwährt
bi plooget immerzue
ha ke Minute Rued
doch s'lost mer niemer zue
ömu nid gnue

i chönnt Öich mini Lide
schungelang beschibe
Schäde und Gebräche
detailliert bespräche
Bräschte und Beschwärde
würdige und wärte
diagnoschtiziere
munter diskutiere
übers infisziere
übers therapiere
übers operiere
übers amputiere
übers transplantiere
Läbere und Niere
tagefüuends Gschwätz
nächtelang Tschäts

doch s'lost mer niemer zue

drum blooset mer i d'Schue

we Dir nid aschtändig mit mir Mitleid heit

de tue ni mir drfür - säuber dopplet leid